

明

史

明史卷十

本紀第十

英宗前紀

英宗諱祁鎮宣宗長子也母貴妃孫氏生四月而立爲皇太子母妃爲皇后宣德十年宣宗崩以正月壬午即皇帝位時方九歲事皆決於皇太后大赦天下以明年爲正統元年丁亥蹇義卒庚寅罷天下鎮守中官減貴州屯糧三之一辛丑始命戶部尚書黃福叅贊機務守備南京遣文武大臣分鎮江西湖廣河南山東二月戊申尊皇太后爲太皇太后庚戌尊皇太后爲皇太后辛亥封弟祁鈺爲郕王甲寅罷諸司冗

費乙丑宥死囚戍邊輸作三月癸酉朔賑芮城饑免其租戊寅放教坊司樂工三千八百餘人辛巳罷營作山陵河南役夫萬七千人癸未減順天役夫二千六百餘人乙酉賑肇慶雷州饑己丑賑通順義香河永清饑免涉逋賦甲午江西山賊曾子良等作亂官軍討平之夏四月丁卯以久旱諭吏部都察院考察天下布政按察二司布政按察二司及巡按御史考察所屬府州縣官務旌賢能黜不肖以弭災變戊辰遣給事中御史督畿南山東河南淮安捕蝗五月癸酉詔任風憲官得互糾劾初仕不得授風憲官御史

缺員都察院及各御史保舉送吏部審察用之庚辰
慮囚減死罪戊邊壬午戶部奏浙江蘇松荒田及官
田減額稅糧請加覆覈帝曰減除租稅欲以蘇民困
也又令所司加覈必將增虛額為民患其己之六月
癸卯寇犯大同丁未瘞暴骸辛酉葬宣宗皇帝于景
陵癸亥命撫按會讞重囚秋七月丙子賜山西今年
夏稅之半己丑申禁出海捕魚戊戌行在刑部左右
侍郎魏源施禮並為尚書是月免真定保定河間順
德淮安黃州平陸災稅八月癸卯詔限天下府州縣
佛寺僧額量留田贍之餘賦貧民丙午減光祿寺膳

夫四千七百餘人九月己卯改施禮於南京乙酉德安饑留運糧三十萬石備賑庚寅龍州獻瑞麥詔所在旱蝗自今若此類俱止之壬辰漕運總兵官及諸巡撫俱入朝集議軍民利便自是歲以八月至京師是月中官王振掌司禮監事冬十月壬寅阿台朶兒只伯等犯涼州鎮番遣使諭之辛亥詔天下衛所皆立學庚申諭吏部自今監司郡守考滿與大臣會議選用毋使常流得倖進十一月庚午御史員缺吏部請起復丁憂者帝以奪情非令典不許辛巳詔天下布政司都司督所屬栽種桑棗戊子禁僧道私度及

妄言惑衆者丙申命大理少卿陳卣考察畿內有司
十二月壬子總兵官陳懋敗阿台朶兒只伯於黑山
丹癸丑沙州衛都督困即來為哈密所侵款塞告饑
命賑之

正統元年春正月丙戌罷銅仁金場庚寅發禁軍三
萬人屯田畿內二月寇犯大同三月癸酉寇犯山丹
策試天下貢士賜周旋等進士及第出身有差夏四
月丁酉朔始躬饗太廟庚子遣禮部侍郎王士嘉等
督畿內捕蝗五月丁卯朶兒只伯寇肅州丁丑汰在
京諸寺番僧壬辰始設提調學校官六月乙巳顧佐

致仕丙午江西左布政使陳智為右都御史己酉迤
北脫脫木兒滿哥帖木兒等率所部來歸閏六月丁
卯申軍民自宮之禁己巳罷陝西織駝氍毹庚辰免靜
海災賦丙戌寇犯肅州是月賑鎮番永昌莊浪涼州
四衛饑秋八月甲戌詔都督蔣貴都督同知趙安發
兵討阿台朶兒只伯庚辰令州縣稅糧折收布絹銀
鈔九月甲午分遣御史軒輶等清理軍政辛丑免陝
西歲供雜物癸卯侍郎何文淵王佐副都御史朱與
言偕中官整飭長蘆兩淮兩浙鹽課庚申遣侍郎李
郁封黎麟為安南國王冬十月免內丘諸縣及華亭

上海災賦十一月壬辰朔免兩浙逋欠鹽課庚戌聽
逃民於所在占籍乙卯詔京官三品以上舉堪任御
史者四品及侍從言官舉堪任知縣者各一人是月
免長沙諸府及濟南被災田租十二月丁丑下兵部
尚書王驥侍郎鄺楚于獄尋釋之乙酉都督同知蕭
授討蒙顧等洞賊平之

二年春正月己亥勅大同總兵官方政偕蔣貴趙安
分道出塞討阿台朶兒只伯己未賑淮安揚州饑貸
民穀種二月丁亥遣使賑順德廣平大名饑三月甲
午慮囚戊午遣御史金敬撫輯大名及河南陝西逃

民夏四月壬戌賑鳳陽饑己卯捕畿內山東河南蝗
壬午免開封彰德河南懷慶衛輝水災稅糧五月庚
寅朔王驥理甘肅邊務辛卯命所在修預備倉丁酉
捕邵蝗壬寅魏源理大同邊務丁未免平涼諸府災
稅辛亥瘞暴骸六月乙亥詔黃州諸府饑民鬻子女
者官為贖庚辰鳳陽淮安揚州諸府徐滁和諸州大
水命右副都御史賈諒工部侍郎鄭辰往賑之秋七
月庚寅弛淮揚川澤之禁八月戊辰賑清河水災是
月免順天廣平真定淮安揚州濟南衡州及崇明水
災稅糧九月己丑免鳳陽漢陽水災稅糧乙卯賑寧

海壽張諸州縣饑冬十月甲子以都督任禮為平羌將軍蔣貴趙安副之討阿台朶兒只伯王驥及太監王貴監督軍務十一月乙巳賑河南饑免其稅糧

三年春正月庚戌兀良哈屢盜邊下詔責之壬子免保定河間大名荊州去年災賦二月丙子賑海豐饑三月癸巳免開封諸府及鳳陽災賦辛丑遣使賑陝西饑庚戌禁祀孔子於釋老宮夏四月乙卯賑淮安揚州饑王驥及任禮蔣貴趙安襲擊阿台朶兒只伯大破之庚午免泗清河災稅癸未立大同馬市五月庚寅揭天下文武方面官姓名於文華殿壁六月癸

酉以旱命中外讞疑獄乙亥命方政等與黔國公沐
晟討麓川叛蠻思任發丁丑免河南被災州縣鹽鈔
二年秋七月癸未朔下胡濙等於獄辛卯下戶部尚
書劉中敷等於獄乙未下刑部尚書魏源等於獄尋
俱釋之八月乙亥令雜犯死罪以下得輸贖九月乙
酉李友直卒癸巳免兩畿湖廣逋賦冬十月丁巳榜
葛刺國貢麒麟胡濙請中外表賀從之是月賑陝西
及如皋興國饑十二月甲寅賑鳳陽徐兗州饑丙辰
下魏源陳智等于獄

四年春正月壬午沐晟等兵至空泥敗績方政死之

二月丁巳蕭授討計砂叛苗苗金蟲等平之閏二月丙申免淮安揚州去年災賦辛丑釋魏源陳智等復其官三月己酉朔大赦天下賑應天鎮江諸府饑罷南京供用庫來年應辦物料庚戌策試天下貢士賜施槃等九十九人進士及第出身有差庚申遼王貴烺有罪廢為庶人丁卯沐晟卒于軍癸酉增文武官吏旗軍祿廩夏四月丙午作京城九門樓成五月庚戌以沐昂為總兵官討思任發捕鳳陽淮安徐開封濟南兗州蝗壬申京師大雨六月乙未賜都人被水者米鈔丁酉祭告天地諭羣臣修省戊戌下寬恤之

詔求直言秋七月庚戌免廣平順德大名淮安揚州
鎮江常州彰德兗州萊州九江瑞州撫州贛州災賦
乙丑罷御史保舉丁卯遣大理少卿李畛察賑河間
諸府災傷壬申汰冗官八月辛巳遣僉都御史張純
察賑順天州縣災傷丙申免鳳陽去年災賦丁酉罷
清軍御史戊戌增設沿海提督備倭官辛丑增南京
文武官祿乙巳禁越告是月賑徐儀真南和邯鄲遂
安諸州縣饑冬十月戊子賑廬州揚州嚴州延安饑
戊戌禁軍民與瓦剌貢使交易十一月免池州隰災
賦十二月丁丑都督同知李安充總兵官僉都御史

王翱叅贊軍務討松潘祁命簇番己丑免太原平陽
高郵災賦

五年春正月己未始躬祀南郊丙寅造海舟於浙江
備倭二月乙亥侍講學士馬愉侍講曹鼎入閣預機
務賑朔應馬邑諸州縣饑甲申以東作將興命張純
李畛加恤流民貸給牛種丁酉免畿內河南災賦三
月乙卯畿內有鬻子女養親者命復其家人賜米二
石丁巳赦思任發罪夏四月壬申朔以山西告災詔
悉蠲諸逋負及逃民稅糧有司不善撫綏者罪之軍
民利病自廵撫及於州縣具以實聞乙酉捕畿內蝗

丙戌松潘祁命簇番降都指揮同知趙諒坐激變伏誅己丑捕開封彰德兗州蝗是月賑畿內及朔代壽陽靜樂諸州縣饑六月丁丑免順天保定真定大名順德蘇州常州淮安去年災賦戊寅慮囚甲午以廷臣所舉知縣多溺于私令科道官廉察以聞進士監生並悉從保任犯賊連坐如制是月賑蘇州松江常州鎮江延安鞏昌饑秋七月辛丑朔遣刑部右侍郎何文淵等分行天下修理荒政悉以便宜行事壬寅楊榮卒戊辰慶王秩燿獻瑞麥瑞瓜胡濙請表賀不許八月戊子詔自今番僧入貢所在以聞不必赴京

師乙未廣荒政於各邊九月壬寅以麓川用兵蠲雲
南逋賦丙午免畿內所貸饑民倉糧冬十一月壬寅
賑浙江饑丁未賑京師饑辛亥罷知縣薦舉仍聽吏
部選授乙丑師宗賊金卽刺等作亂沐昂討平之十
二月庚午賑桃源江都萬饑戊子增鄉會試取士額
庚寅以南京多災變勅責文武諸臣是冬免南畿浙
江山東河南災賦

六年春正月己亥朔日當食不食胡濙請表賀不許
乙卯以莊浪地屢震躬祀郊廟遣使祭西方嶽鎮以
蔣貴為平蠻將軍都督同知李安都督僉事劉聚副

之計思任發王驥總督軍務二月壬辰免順天保定大名河間鳳陽鎮江開封彰德大同災賦夏四月己巳禁私創寺觀乙亥分遣戶部右侍郎陳璘等督兩畿捕蝗己卯以災異數見遣使祭郊社山川壬辰以南京大風為災遣使祭高廟甲午命三法司擇屬吏省天下疑獄五月丙午捕江浦蝗庚戌捕順天蝗癸丑命何文淵及大理卿王文錄在京刑獄巡撫侍郎周忱刑科都給事中郭瑾錄南京刑獄六月甲戌捕濟南青州萊州蝗丁亥右都御史陳智黜為民以王文代之是月免河間房山淮安徐海壽光全椒來安

災賦秋七月丁酉捕河南山東及太原蝗丁未賑浙
江及辰州諸府饑遣大理少卿顧惟敬等分督順天
河間順德捕蝗八月庚午賑常州池州蘇州及桐城
饑米凡六十餘萬石冬十月丁丑戶部尚書劉中敷
等下獄荷校長安門外半月乃釋之庚寅免畿內災
賦是月賑平陽及豐饑十一月甲午朔以乾清坤寧
二宮奉天華蓋謹身三殿成大赦天下詔定都北京
文武諸司復去行在之稱癸卯王驥大破麓川賊于
上江己酉詔嚴邊界立碑如舊制是月免鳳陽諸府
及河南山東災賦閏十一月甲戌劉中敷等復下獄

踰冬始釋之十二月甲午免太平災賦甲辰免池州
災賦庚申戶部左侍郎王佐為尚書是月王驥等克
麓川思任發走孟養李安攻餘賊于高黎貢山敗績
七年春正月癸未遣吏部左侍郎魏驥等分行兩畿
捕滅蝗種二月乙卯罷大臣朔望酒饌三月壬戌朔
謁天壽山陵甲子至自天壽山乙亥免陝西逋賦戊
寅策試天下貢士賜劉儼等一百五十一人進士及
第出身有差戊子捕遵化蝗夏四月免開封濟南平
陽災賦五月辛未命南京造遮洋船由海道運糧赴
薊州壬申戶部左侍郎徐晞為兵部尚書戊寅立皇

后錢氏乙酉賑巢饑丁亥倭陷大嵩所六月壬子戶部右侍郎焦宏整飭浙江備倭乙卯吳中卒秋七月丙寅贖陝西饑民之鬻子者仍賜賑免其逋賦戊寅工部左侍郎王忬為尚書辛巳免淮安災賦八月己丑分遣御史清軍壬寅復命王驥總督雲南軍務九月甲戌陝西進嘉禾胡濙請表賀不許冬十月己亥召襄鄭荆淮四王入京乙巳太皇太后崩癸丑始御西角門視事十一月己巳兀良哈掠寨兒山庚辰免平陽去年災賦十二月壬辰免濟南萊州青州登州災賦

八年春正月丁卯復命魏驥等分行兩畿捕滅蝗種
己巳郭璉罷以禮部左侍郎王直代之是月免淮安
宿災賦二月己丑汰南京冗官己亥以採辦擾民命
凡地產所宜以歲賦折收分輸兩京癸卯免廣平災
稅三月戊午詔逃民於所在占籍復徭役三年願歸
鄉土者秋成遣之除公私逋負癸未魏源致仕戶部
右侍郎王質為刑部尚書夏四月庚寅免鳳陽靈璧
去年災稅庚子禱雨五月甲戌復以蔣貴充總兵官
同王驥征麓川仍詔緬甸執獻思任發木邦協討思
機發等戊寅雷震奉天殿鳴吻輟朝三日昭告天地

諭羣臣修省大赦天下六月丙午免湖廣逋賦是月
王振殺侍講劉球于獄又下大理少卿薛瑄獄論死
秋七月戊午又枷祭酒李時勉國子監門三日是月
刑部尚書王質下獄八月癸未朔以右副都御史金
濂代之壬辰復宋儒周敦頤程顥司馬光朱熹子孫
徭役己亥應天鎮江常州早命加撫恤九月丙子免
萊陽文登棲霞災賦庚辰命京營軍士非奉詔毋擅
役冬十月壬午朔禁中官私結朝臣庚子免桃源益
城清河去年災賦十一月丙寅賑巢饑己卯增設按
察司僉事一人崑理屯田庚辰免安慶災賦是月宣

宗廢后胡氏卒十二月免順德通災賦

九年春正月甲寅王文巡延安寧夏邊辛未命成國公朱勇興安伯徐亨及都督馬亮陳懷太監僧保等分道征兀良哈無功而還乙亥免饒陽災賦己卯遣兵部右侍郎虞祥等分行兩畿捕滅蝗種二月甲午免獻災賦丙午王驥等進擊麓川賊破之思機發遁俘其孥以獻遂召驥還三月辛亥朔太學成釋奠于先師孔子甲子楊士奇卒乙丑禱雨丙寅敕征兀良哈功庚午寧夏總兵官黃真等勦寇於阿良哈俘其衆以獻夏四月庚辰朔禱雨丙戌翰林學士陳循入

閣預機務丁亥沙州及赤斤蒙古衛饑請種糧戶部
奏糞人貸糧無故事帝曰春秋譏閉糴朕為糞夏主
可視其困而弗救耶命量給之癸卯遣使禱雨于嶽
瀆五月辛未命刑部右侍郎馬昂往南京錄囚丁丑
免保定大名及淮安和去年災賦六月壬午賑湖廣
貴州苗蠻饑丙戌論再征麓川功秋七月己酉駙馬
都尉石璟忤王振下獄處州礦賊葉宗留等入福安
殺福建叅議竺淵壬子免河南及隰去年災賦閏七
月戊寅朔復開浙江福建銀場甲申瘞暴骸己丑免
池州災賦乙巳以雷震奉天殿鳴吻祭告宗廟天地

八月庚戌免陝西災賦仍發廩賑之贖其鬻子乙丑
免山東及揚州災賦九月丁亥王驥陳鎰整飭西北
沿邊軍馬聽便宜處置辛卯免鎮江災賦冬十月乙
丑頒釋道大藏經典於天下寺觀庚午兀良哈貢馬
謝罪十一月辛卯賑鎮遠靖饑甲午免廣平去年災
賦十二月癸丑免常州去年災賦甲子疏繫囚非殊
死者並減二等杖以下宥之癸酉賑赤斤蒙古饑甲
戌復賑西安諸府饑是年兩畿山東河南湖廣浙江
大水江河皆溢

十年春正月戊子詔舉智勇之士庚子免順天及山

西災賦二月己未免陝西逋賦丙寅兀良哈貢馬請
貸犯邊者不許立誅於市三月甲戌朔謁天壽山陵
丙子至自天壽山自是歲三月謁祭以為常庚辰恩
機發入貢謝罪庚寅策試天下貢士賜商輅等一百
五十人進士及第出身有差辛丑詔畿內山東山西
河南陝西鎮巡三司遣使巡行所屬招集流移賑貸
饑殍罷一切不急務有司貪暴鬬茸者逮送京師夏
四月乙巳遣御史提督浙江福建銀場乙卯命工部
侍郎王佑同中官董修大功德寺庚申詔凡逃民復
業官貸以粟流移就食者所在賑之五月己卯寇犯

安化六月癸卯朔以浙江陝西疫遣使祭南鎮西嶽
西鎮之神乙丑陝西饑賜貧民田賦三之二仍輸河
南布十萬疋易粟賑之是夏免真定河間及常州太
原平陽災賦秋七月戊寅捕保定真定兗州蝗辛巳
免廣平大名保定鎮江水災稅糧八月壬戌賑江都
饑是月免南畿浙江湖廣災賦九月庚寅兵部左侍
郎鄭瑋為尚書冬十月甲辰徐晞致仕乙丑陳鎰還
治院事戊辰侍讀學士苗衷為兵部右侍郎侍讀學
士高穀為工部右侍郎入閣預機務十二月甲寅畿
內野蠶成繭製為幃褥躬薦宗廟丙辰麓川賊思任

發伏誅壬戌輸河南粟賑陝西饑廣西擒賊韋萬王
伏誅是月免揚州濟南災賦

十一年春正月庚辰予王振等弟姪錦衣衛世職遣
使分行兩畿山東河南捕滅蝗種二月辛酉以異氣
見華蓋殿頂及奉天殿獸吻遣使祭告天地癸亥下
寬恤之詔罪犯非殊死者遞減其等杖以下並釋之
三月戊辰朔下戶部尚書王佐刑部尚書金濂右都
御史陳鑑等于獄尋釋之壬申命御史柳華督福建
浙江江西兵討礦賊癸巳免武定去年水災稅糧夏
六月癸亥勅責占城令毋侵安南是夏免順德真定

湖州嘉興台州災賦秋七月庚辰楊溥卒戊子諭思
機發入朝壬辰賑沙州衛饑八月戊戌免湖廣災糧
庚申下吏部尚書王直等于獄尋釋之九月辛巳廣
西徭賊入化州執知州茅自得戊子任禮奏瓦剌也
先意將入犯命諸邊飭戎備冬十月乙巳也先過大
同邊乞糧命鎮臣拒之丁未免淮安徐濟寧水災稅
糧仍賑之甲寅遣給事中御史分資諸邊軍士甲子
詔吏員非才能有清譽者毋濫舉十二月甲辰甘州
疫遣使祭西嶽鎮及甘肅山川是歲增市廛商賈稅

十二年春正月戊寅禁違制奢僭之服甲申免順德
災糧二月甲寅命侍講杜寧等進學於東閣三月丙
子免杭州嘉興湖州災賦己卯沙州衛都督僉事喃
哥等率所部內附分處之山東夏四月免保定河間
真定大名廣平蘇州松江常州鎮江廬州惠州潮州
災賦賑淮安襄陽荊州岳州郴饑閏四月甲子免太
原汾州災糧丁卯捕保定濟南淮安蝗庚寅免應天
太平寧國池州安慶水災稅糧五月己亥遣大理少
卿張驥由濟寧至揚州發粟賑饑招輯流散蠲免雜
徭逋賦斥官吏之害民者六月甲申免垣曲災賦是

月賑臨江吉安贛州沂饑秋七月甲辰詔各邊練軍
備也先九月乙未馬愉卒丁巳也先遣使入貢挾回
回哈密使俱至冬十月庚辰詔方面有司非九年任
滿毋得保留十一月己丑朔賑南昌吉安臨江撫州
廣信饒州九江饑庚寅皇長子見深生十二月壬戌
免吉鄉寧災糧

十三年春正月庚戌免廣平去年災賦二月己未幸
大興隆寺丁卯王奄致仕三月戊子詔數孟養罪責
獻思機發癸己免順天河間重慶災賦庚子策試天
下貢士賜彭時等一百五十一人進士及第出身有

差壬寅都督同知宮聚充總兵官統諸軍討思機發
王驥仍總督軍務夏四月庚辰遣刑部右侍郎薛希
璉等分督兩畿州縣捕蝗辛巳慮囚死罪遞減三等
杖以下釋之是月免浙江江西湖廣災糧五月乙酉
朔捕濟南青州萊州登州蝗丁亥山西左布政使石
璞為工部尚書庚寅禁民間用錢甲辰刑部右侍郎
丁鉉巡視河南山東賑恤災民逮治貪吏壬子賑無
為饑癸丑免隰去年災糧六月戊午賑郟城費饑已
卯免濟南諸府去年災糧秋七月癸巳罷大臣舉官
例己酉河決河南浸淫曹濮東昌命工部右侍郎王

永和治之是月免真定太平西安萊州諸府災賦八月乙卯福建賊鄧茂七反己未免應天蘇州諸府災糧甲戌命御史丁瑄往福建撫捕賊寇左都督劉聚僉都御史張楷帥師繼之九月辛丑寧都大水命賑恤之並免兗州稅糧冬十月戊午免池州災糧十一月丙戌陳懋為總兵官保定伯梁瑄平江伯陳豫等副之帥師討鄧茂七刑部尚書金濂叅贊軍務丁亥通渭平涼華亭山崩壅水沒禾稼詔免其稅糧甲辰處州賊葉宗留掠旁府州縣丙午以福州盜起民困發廩賑之庚戌永康侯徐安備倭山東壬子免鎮江

寧國廣德滁及辰州災賦十二月甲寅免濟南兗州
去年災稅庚午廣東賊趙青壯等作亂

十四年春正月乙巳免浙江福建銀課辛亥免順天
大名河間開封諸府災賦二月丁巳御史丁瑄誘擊
鄧茂七於延平斬之己巳王驥破思機發於金沙江
又破之鬼哭山思機遁詔班師辛未都指揮僉事
徐恭充總兵官討葉宗留石璞叅贊軍務三月丁酉
詔赦處州脅從為亂者除其逋賦賜復三年夏四月
辛亥免保定災賦壬戌詔王驥等回師討貴州苗寇
癸亥免濟南東昌水災秋糧乙丑遣御史十三人同

中官督辦浙江福建銀課壬申禱雨五月庚辰朔福建捕賊御史柳華自殺丙戌陳懋等擊沙縣賊擒鄧伯孫等壬辰以旱始命太監金英同法司慮囚己亥侍讀學士張益入閣預機務庚子免兗州去年災糧殺巡按福建御史柴文顯汪澄六月丙辰南京奉天謹身華蓋三殿災壬戌賑南昌吉安臨江水災甲子以也先謀入寇詔河南陝西番休諸軍盡赴宣府大同防禦戊寅平鄉伯陳懷等往大同都督王貴吳克勤往宣府各率京軍訓練秋七月己丑瓦剌分道入寇用王振言下詔親征羣臣諫不聽癸巳命郕王祁

鈺居守張輔朱勇顏興祖等率師從是日瓦剌兵圍
馬營城西寧侯宋瑛武進伯朱冕與也先戰於陽和
敗沒甲午帝發京師丁酉至居庸關羣臣請駐蹕不
許辛丑至宣府大風雨邊報益急羣臣復請駐蹕不
許丙午次陽和時伏屍滿野衆益危懼寇僞引退以
誘六師八月己酉駐大同鎮守太監始議旋師命廣
寧伯劉安充總兵官鎮大同庚戌帝東還夜有黑雲
如蓋覆營上大雷雨軍中擾亂丁巳至宣府庚申也
先兵大至恭順侯吳克忠與其弟都督克勤戰歿朱
勇及承順伯薛綬救之至鷄兒嶺遇伏全軍盡覆辛

酉次土木掘井二丈餘不得水壬戌移營敵乘之大
潰死者數十萬英國公張輔秦寧侯陳瀛駙馬都尉
井源平鄉伯陳懷襄城伯李珍遂安伯陳瓊修武伯
沈榮都督梁成王貴戶部尚書王佐兵部尚書鄭瑄
直內閣吏部左侍郎兼翰林學士曹鼐侍讀學士張
益等俱死之也先擁帝北去甲子報至京師大震時
士馬輜重喪失無餘京營疲卒不滿十萬人心恟懼
羣臣聚哭於朝侍講徐程請南遷兵部侍郎于謙抗
言不可遂定議堅守也先擁帝至宣府將害之旋止
乙丑皇太后命郕王監國戊辰也先擁帝至大同總

兵官劉安出謁辛未擁帝至威寧海子乙亥令旨責
劉安輕忽無謀諭沿邊諸將戾剌即奉駕至恐為所
誘俱毋得輕出九月癸未邸王即位遙尊帝為太上
皇帝

論曰帝初政簡靜任用老成之力也無何嗜好漸偏
動多出入奸豎王振因而竊弄其間土木之禍振蓋
罪通於天矣獨是太祖懲前代閹寺之患首禁宦官
典兵預政至鑄為鐵牌頒之各司俾子孫遵守此其
用心可謂至矣帝之世去祖宗朝幾何時而貂璫之
徒遂肆惡至此言之可為於邑且帝天資敏達非桓

靈懷愍比也當時蒙塵北狩身陷虜庭宗社且危於
累卵上天悔禍乃得還轅非常之變故誰實致之乎
恐碎糜豎骨猶未足以洩朝野之忿而蔽誤國之辜
矣乃帝顧絕不以為悔舊恩眷念帷蓋頻施即卹予
不為少替豈宵小狐媚之技能入人肺腑而結其私
雖英主哲辟亦或墮入其彀中而莫能勘破耶斯誠
可為寒心者矣噫

明史卷十一

本紀十一

景帝

景帝諱祁鈺宣宗次子也英宗即位封為郕王正統十四年秋八月壬戌英宗北狩乙丑皇太后命監國丙戌悉運通州糧入京師官俸軍糧皆預給召陳懋金濂還徵兩畿山東河南衛所沿海備倭及運糧諸軍衛京師丁卯立皇子見深為皇太子戊辰令羣臣直言時事舉人才兵部左侍郎于謙為尚書己巳郕陣亡傷殘將士庚午籍王振家振姪指揮山伏誅命陳鑑撫安畿內軍民甲戌懸賞格募人納草乙亥輸

南京兵仗于京師修撰商輅彭時入閣預機務掌大理寺事右都御史俞士悅改掌院事是月賑偏橋饑九月戊寅朔增兵守居庸關及諸隘口癸未即皇帝位遙尊英宗為太上皇帝大赦天下以明年為景泰元年詔方面御史復行保舉法司務依律議獄除一切條例免景泰二年田租十之三甲申夷王振族庚寅免夏水災稅糧癸巳都指揮僉事季鐸奉皇太后命達于上皇所甲午戒諭文武羣臣遣使祭宣府土木陣亡將士瘞其遺骸戊戌廣東賊黃蕭養圍廣州敗總兵官安鄉伯張安都指揮僉事王清軍己亥罷

清軍御史辛丑擢兵科給事中孫祥兵部郎中羅通
並為右副都御史守紫荆居庸關甲辰命侍講徐瑄
等行御史事與御史白圭等募兵於畿內山東山西
河南起前成山侯王通為都督僉事提督京城九門
都督同知陳友率師討湖廣貴州苗賊乙巳遣李鐸
奉書上皇告即位及迎復之意并諭也先送上皇還
京師丙午苗寇圍平越調四川雲南兵會王驥討之
以前廣東叅議楊信民為右僉都御史督兵討黃蕭
養冬十月戊申朔赦浙江福建廣東湖廣貴州羣盜
許其自新也先等擁上皇至大同己酉命獄囚運通

州米入京師贖罪庚戌上皇至陽和壬子詔諸王勤
王申嚴將士賞罰乙卯于謙提督諸營軍馬石亨等
率師分陳京城九門丙辰免全椒災糧也先等陷紫
荊關副都御史孫祥死之京師戒嚴丁巳詔宣府總
兵官楊洪遼東副總兵焦禮施聚及山東山西河南
陝西巡撫募兵御史各將兵入援也先等擁上皇次
良鄉戊午上皇至盧溝橋致書于帝諭羣臣固守社
稷也先列陣西直門上皇止德勝門外都督高禮毛
福壽敗敵於彰義門北殺三百人命石亨于謙選精
兵屯教場都指揮以下不用命者斬以徇太監興安

李永昌同謙等理軍務己未也先擁上皇登土城要大臣迎駕以通政叅議王復為右通政中書舍人王榮為太常少卿出城朝見也先大索金帛復邀于謙等出見拒之庚申遣使徵朝鮮等兵會遼東軍討賊召河州諸衛土軍入援于謙石亨等連敗敵衆敵引却敵別部攻居庸關亦為守將所敗壬戌也先擁上皇由良鄉西去縱兵大掠焚長陵獻陵景陵諸寢殿遣書諭也先令退屯山下止遣一二十人送上皇還京師甲子上皇出紫荊關丙寅出御馬監馬駕戰車丁卯詔止勤王兵瓦剌可汗脫脫不花遣使入貢辛

未楊洪充總兵官孫鏜范廣副之勦畿內餘寇壬申
敗之於霸州癸酉命副都御史王暹撫安近畿軍民
甲戌修復三陵寢殿十一月丁丑朔瓦剌使臣還致
書于其可汗癸未調刑部尚書金濂於戶部改俞士
悅為刑部尚書召左都御史陳鎰還理院事修沿邊
關隘乙酉徵馬三萬匹於朝鮮辛卯毛福壽為副總
兵討辰州苗寇壬辰上皇至瓦剌乙未命刑部侍郎
耿九疇撫安鳳陽諸府流民缺食者賑之免其賦役
三年丁酉命僉都御史祝暹陸矩蕭啓各偕都指揮
一人鎮河間保定真定免順天河間保定真定未徵

芻糧十二月庚戌尊皇太后為上聖皇太后辛亥王
驥為總兵官討貴州苗寇都督同知董興為左副總
兵統江西廣西軍討黃蕭養戶部侍郎孟鑑叅贊軍
務癸丑尊生母賢妃吳氏為皇太后甲寅立妃汪氏
為皇后丙辰詔赦天下丁巳僉都御史陳詔都督同
知陶瑾撫勦處州餘寇己未命石亨楊洪柳溥等分
督京營訓練癸亥瓦剌寇大同官軍擊却之戊辰祭
陣亡官軍于西直門外是冬寇犯甘肅

景泰元年春正月丁丑朔以上皇在北罷朝賀庚寅
沙縣尤溪餘賊復亂命都指揮仲福率南京衛卒往

討之甲午石亨往大同楊洪往宣府督軍巡哨庚子
免畿內八府軍需三之一閏正月甲寅瓦剌兵掠寧
夏癸亥詔會試取士毋拘額乙丑罷福建採銀丁卯
彭時守制歸戊辰減光祿寺廚料十之四庚午郭登
敗瓦剌兵於沙窩又追敗之拷棧山辛未始命鎮守
巡撫官以家屬自隨官給廩膳之停浙江諸處織造
是月免大名真定開封衛輝災賦二月戊寅耕籍田
壬午命戶部右侍郎沈翼等分往山東山西河南陝
西操練民壯丙戌石亨佩鎮朔大將軍印充總兵官
巡大同都指揮同知楊能充遊擊將軍巡宣府罷處

州採銀辛卯朝鮮進馬五百匹詔償其直壬辰獲叛人喜寧伏誅三月己酉瓦剌自朔州入寇辛亥錄土木死事諸臣後詔各官納草還職者止給冠帶癸丑瓦剌寇寧夏抵慶陽乙卯寇朔州丙寅詔安南占城保境睦鄰丁卯祈雪是月免畿內諸府逋賦及夏稅有差夏四月丙子廣東都指揮李昇何貴等率舟師追海賊兵敗被殺辛巳瓦剌寇大同官軍迎戰擒其行軍尚書虎察誅之壬午罷提學官丁亥梁珪代王驥討貴州苗寇戊子命大理寺丞李茂考察南京百官錄罪囚訪軍民利病庚寅罷僧道度牒辛卯免太

原汾州去年災糧癸巳禱雨丙申瓦剌兵寇雁門詔石亨等調兵援之丁酉瓦剌入石峰口燒關門而去己亥遣都指揮石端等率馬步軍于真定保定涿州易州通州分屯訓練劉安充總兵官領之僉都御史曹泰叅贊軍務庚子賑山東饑辛丑賑畿內被寇州縣罷一切科買物癸卯瓦剌寇大同郭登擊却之鎮守福建都督僉事范雄等俘沙縣賊首林居等以獻是月董興等擊黃蕭養破之蕭養死五月乙巳免山西災賦瓦剌掠河曲及義井屯堡分兵自代州南下詔劉安督涿易諸軍禦之副總兵都督僉事田禮討

貴州苗賊敗之戊申瓦剌寇雁門詔益兵守黃花鎮
以衛陵寢辛亥瓦剌寇宣府癸丑寇威寧乙卯以旱
災星變勅法司慮囚壬戌賑大同被寇軍民丙寅侯
璉等大破貴州苗賊己巳免保定去年災賦辛未瓦
剌知院阿剌遣使貢馬請和詔俟兵退後議之六月
己卯董興等破廣東餘賊執黃蕭養父大綱賊平壬
午瓦剌寇大同郭登擊却之乙酉罷御史監閱內府
監局丙戌也先復擁上皇至大同丁亥左都御史陳
鑑王文下獄尋釋之戊子瓦剌寇宣府朱謙紀廣等
禦却之庚寅寇大同甲午復罷方面御史保舉城臨

清丙申命楊俊石彪俱為遊擊將軍俊巡涿易彪巡太原戊戌阿剌復遣使貢馬免德諸州縣災糧己亥擢禮科都給事中李實為禮部右侍郎大理寺丞羅綺為右少卿同使瓦剌壬寅也先使至居庸關命李實等賫銀幣迎犒之即與偕往秋七月癸卯朔免廬陵諸縣水災夏稅戊申瓦剌可汗遣使來議和庚戌侯璉方瑛破貴州苗擒偽苗王王阿等械至京伏誅庚申命右都御史楊善工部右侍郎趙榮使瓦剌都指揮同知王息千戶湯肩勛副之免山西夏稅十之三秋糧十之六停大同運糧辛酉免海安東鹽城水

災秋糧癸亥李實還自瓦剌以也先使者把禿等來
賜勅報之己巳免慶遠柳州逋賦是日楊善等抵瓦
剌也先許送上皇還八月癸酉上皇發瓦剌戊寅遼
東被寇總兵官曹義等擊却之壬午上皇至宣府甲
申遣商輅迎上皇于居庸關丙戌上皇還京師帝迎
見于東安門遂入南宮帝及百官朝謁庚寅赦天下
辛卯刑部右侍郎江淵兼翰林學士入閣預機務癸
巳御奉天門宴瓦剌送駕使臣奴塔台等授都督僉
事等官並賜冠帶賞賚有差己亥苗衷致仕九月丁
未免順天去年被寇稅糧癸丑以巡撫河南左副都

御史王來為右都御史總督湖廣貴州軍務討苗寇
己巳免寶應水災稅糧冬十月辛卯慮囚癸己免畿
內逋賦己亥梁珪等破貴州苗賊十一月壬寅始命
僉都御史王竑總督漕運戊申勅吏部自今耆民奏
保有司復任非有異政勿與申理仍命都察院榜示
天下禁之辛亥上皇壽節胡濙等請朝賀不許是月
賑宣府及馬邑饑十二月丙戌賑大同饑丙申胡濙
等請明年正旦百官朝上皇于延安門不許自是朝
賀皆廢

景泰二年春正月辛亥廷臣劾天下朝覲官命運糧

口外贖罪丙辰平陽太原大同諸府饑命富民輸粟
授官戊辰給大同貧民穀種免真定稅糧是月賑廣
昌靈丘臨洮饑民及廣西被寇州縣皇后命度僧三
萬人二月辛未幸太學釋奠於先師孔子癸酉南京
山川壇井醴泉出詔勿賀己卯免河間揚州災糧給
太原貧民穀種辛卯以星變命廷臣條寬恤事行之
癸巳詔畿內及山東巡撫官舉廉能屬吏專司勸農
授貧民荒田貸牛種乙未市牛種賜宣府大同屯軍
是月賑廣平大名西安饑民及山西被寇者三月壬
寅策試天下貢士賜柯潛等二百一人進士及第出

身有差丙辰免濟南去年災稅夏四月丙子陳鎰鎮
陝西壬午王來梁瑋等破貴州苗賊俘其首韋同烈
以獻甲午寇犯宣府馬營五月辛丑賑解饑乙巳城
固原丁未瓦剌使臣請遣報使王直胡濙等皆力奏
帝曰祖宗來戎醜遠遁莫敢窺伺惟絕其來往故也
頃奸臣圖小利遣使通好致生釁端幾危宗社朕志
在雪恥思與寇絕卿等宜圖長策乃但為苟且計豈
朕所望耶庚申賜瓦剌可汗脫脫不花書曰朕祖宗
時萬國朝貢悉加恩禮初不遣報使以故長保和好
比者可汗及太師數遣使朝貢朝廷嘉乃款誠使命

不絕豈期我使者貪功嗜利用激彼怒致失歡好賴
天之靈要約如故朕與可汗可不思所以保之使至
厚加禮遇進其官秩所賜可汗及妃金銀並金銀器
織金蟒龍文綺并賜都督等綵幣付來使可汗自今
第遣使來朕終始善視必不食言六月己卯命貴州
修舉屯政乏牛種者官給之秋七月戊戌賑宣府蔚
饑戊申普定永寧畢節諸苗復叛命梁珪等留軍討
之乙丑何文淵為吏部尚書與王直協理部事是月
免高郵儀真去年災糧又免上元諸縣稅糧之半大
同夏稅十之七八月丙子免太平稅糧之半陝西夏

稅十之四辛巳復午朝禁福建廣東浙江軍民家私
藏兵器甲申命光祿寺日給喇嘛國師禪師僧官五
百餘人酒肉如舊例九月丙申朔始命常朝日內閣
與錦衣官東西對立午朝先部臣奏事乙卯禁諸司
保舉起復是月免大同秋糧又免鎮江揚州溫州石
城宜興災糧冬十月己巳免懷慶彰德去年災稅丙
戌詔天下學校師生俸廩以軍興減者復之己丑免
濟南太原平陽及澤潞諸州去年災賦十二月壬申
沙縣餘賊平甲申命貴州軍民被寇復業者所司賑
贍之己丑詔諸邊嚴飭武備庚寅禮部左侍郎王一

寧祭酒蕭鑑並兼翰林學士入閣預機務壬辰也先
弑其主脫脫不花是月免陝西諸府及沙尤溪江浦
諸縣災賦

三年春正月辛丑罷入粟補官免順德逋賦二月庚
辰免海逋賦乙酉以宣府萬億庫雜物賑給軍民命
左副都御史劉廣衡錄南京囚戊子戶部尚書金濂
下獄尋釋之改工部壬辰提督遼東軍務左都御史
王翱還理院事三月辛丑還金濂于戶部詔諸王非
令節聖壽不得與守土官會飲甲辰命錦衣指揮畢
旺緝事丙辰召南京禮部尚書儀銘為兵部尚書同

于謙協理部事戊午都督毛福壽等討湖廣巴馬諸苗賊克之壬戌召陳鑑還理院事夏四月庚辰命廷臣舉將材癸未免興化災賦乙酉置東宮師傅及詹坊等官五月甲午廢皇太子見深為沂王立皇子見濟為皇太子廢皇后汪氏立太子母杭氏為皇后封皇子見清榮王見淳許王大赦天下乙未皇太子大賚百官辛丑命河南流民復業者計口給食復賦役五年乙巳詔取顏孟二氏子孫長而賢者各一人至京師官之癸丑以立皇太子賜親王公主銀幣六月申子建大隆福寺丁丑捕歷城長清蝗辛巳免開封

災糧己丑賑海邳安東諸州縣水災道士蔣守約由
太常寺卿擢禮部尚書仍掌寺事秋七月乙未左都
御史王翱總督兩廣軍務丙申錦衣指揮盧忠尚衣
大監高平上變告上皇與少監阮浪內使王瑤圖復
位捕浪瑤治之皆死壬寅王一寧卒戊申詔甘肅守
臣羗人入貢無驗勿納玉石不堪者却之戊午以肇
慶被寇吉安諸府被災免其稅糧八月乙丑遣使賑
徐兗州水災戊辰命右都御史洪英尚書孫原貞薛
希璉等分行天下考察官吏丁丑免兩畿州縣水災
稅糧仍發廩賑之乙酉賑南畿河南山東被災流民

九月庚寅朔江淵以母喪去詔起復辛卯以南京地震兩淮大水害稼河決久不治命王文巡視安輯以太牢祭河神乙未賑兩畿山東山西福建廣西江西遼東被災者丁酉罷大臣兼俸命王文考察兩京庶官癸卯詔停河南山東湖廣歲辦物料丙午免壺關被寇秋糧閏九月壬戌賑淮安鳳陽水災仍免其稅糧癸未復開處州銀場是月福建盜復起冬十月戊戌左都御史王文改吏部尚書兼翰林學士入閣預機務丙辰遣右都督孫鏜都督僉事石彪協守大同都督同知衛穎都督僉事楊能張欽協守宣府以備

也先十一月戊辰方瑛奏平白石崖諸苗甲戌命畿
內及山東山西有司撫卹逃民復賦役五年庚辰遣
大理少卿張固捕盜山東是月免畿內山東淮安徐
吉安袁州水災稅糧十二月癸巳始立團營太監阮
讓都督楊俊等分統之聽于謙石亨及太監劉永誠
曹吉祥節制庚子命布政使按察使缺官三品以上
保舉丙辰免永平及河南災糧

四年春正月甲戌賑徐饑己卯免鳳陽揚州去年災
糧壬午河復決沙灣新口二月戊子朔五開清浪諸
苗復發命梁瑋仍充總兵官王來總督軍務往討之

壬辰減近侍官及內府諸人日給酒肉癸巳王文還朝是月免廣平吉安諸府去年災糧三月戊寅命鎮守福建太監戴細保督開建寧銀場庚辰召王翱還朝辛巳勅公侯駙馬伯習練武事壬午命侍郎鄒幹賑徐濟寧饑除公私逋負夏四月戊子朔復築沙灣決口成運南京倉糧十萬石賑徐州丙午免長沙諸府去年災賦之半己酉以賑荒詔天下生員納米得入監讀書癸丑詔沿河有司以收貯雜木易米賑饑五月丁巳朔出徐淮倉粟賑饑蘇州諸府運南京糧以補之己巳王文以母喪去詔起復壬申留山東應

運米九十二萬石備賑癸酉禱雨甲戌徐州大雨水
沒稼民饑益甚詔悉以改撥支運及益課糧賑之丁
丑運淮安倉糧十五萬石賑鳳陽乙酉河復決沙灣
是月免真定及長垣災賦六月壬辰吏部尚書何文
淵下獄尋釋致仕以王翱代之甲午詔各邊嚴兵備
也先辛亥收瘞土木大同紫荆關暴骸秋七月丙辰
朔免杭州寧波台州諸府去年災賦壬戌禱雨癸酉
大理寺卿蕭維禎左副都御史羅通為左右都御史
庚辰詔內外諸司敬慎刑獄停諸不急工役八月己
丑留開封諸府應輸京儲米賑河南罷生員輸粟入

監甲午也先自立為可汗丁酉巡撫右都御史洪英
下獄尋釋致仕是月免兗州東昌福州興化漳州泉
州災賦九月乙卯陳鎰致仕庚午免桂林柳州去年
災糧冬十月庚寅詔天下鎮守巡撫官督課農桑果
木甲午擢徐有貞右僉都御史治沙灣決河戊戌也
先遣使獻馬丁未詔京營及諸邊嚴飭戎備是月免
涿房山良鄉被災及柳州諸府被寇秋糧十一月辛
未皇太子薨丁丑免開封諸府災糧己卯蕭維禎以
母喪去詔起復十二月甲辰命廷臣各舉將材乙巳
發內帑銀三十七萬餘兩分遣御史賚各邊軍士是

月免濟南青州萊州及濮臨清范滕諸州縣災糧鳳陽災稅

五年春正月戊午黃河清自龍門至于芮城廷臣請賀不許丙寅免廣平真定保定淮安去年災賦壬申罷福州建寧銀場甲戌遣陳豫江淵撫安山東河南被災軍民命廷臣議寬恤事宜仍推行于畿輔二月癸巳召巡撫湖廣右都御史李實還理院事辛丑金濂卒南京兵部尚書張鳳代之甲辰免黃州諸府去年災糧乙巳以雨暘弗時引咎自責諭廷臣修省直陳弭災事宜戊申發內帑銀萬五千兩賜鳳陽淮安

揚州徐貧民市穀種三月壬子朔策試天下貢士賜
孫賢等三百四十九人進士及第出身有差辛酉勅
江淵王竑賑淮北饑民死者督瘞埋之揚州蘇州諸
府命王文往撫卹之甲子都督兩廣副都御史馬昂
奏破瀧水徭俘其首周鐵成等以獻戊寅禱雨庚辰
緬甸執思機發檻致京師以銀戛諸地畀之思機發
伏誅夏四月甲申石璞起復辛卯方瑛等大破草塘
苗賊俘其首以獻伏誅辛丑以江南北屢告災遣高
穀祭祖陵皇陵孝陵乙巳更定兩京工匠班次歷四
年一代五月甲子下禮部郎中章綸御史鍾同于詔

獄已已賑南京火災瘞其死者六月辛巳朔免濟南
東昌青州萊州汝寧南陽災稅戊子錄囚秋七月丙
寅儀銘卒壬申命度僧仍限額癸酉復遣使賑蘇州
松江鳳陽廬州淮安揚州水災八月丁酉復命天下
巡撫赴京議事九月壬戌免蘇州松江常州揚州杭
州嘉興湖州漕糧二百十七萬石別運淮安徐州臨
清德州倉糧以補之七府雜辦悉除免冬十月庚辰
命左副都御史劉廣衡巡撫浙江福建專司討賊免
真定順德廣平大名彰德衛輝懷慶吉安災賦十一
月戊午罷蘇州松江常州鎮江織造採辦十二月丙

戊申嚴婚喪服舍僭侈之禁丙申放還元年所募義勇七千餘人並給復一年是月免蘇州松江常州鎮江揚州杭州嘉興湖州及霸灤饒陽東平武陟諸州縣災賦是年也先為知院阿剌所殺

六年春正月庚戌調石璞于兵部以江淵為工部尚書是月免應天太平寧國池州安慶及和祁清苑興濟諸州縣去年災糧二月壬午命太監王誠同法司刑科錄囚大理少卿李茂等錄南京浙江囚戊子免廬州去年災賦辛卯賑徽州饑三月癸丑還浙江漕卒罷民運乙卯免武昌黃州漢陽荊州災賦夏四月

辛巳以災傷勅戶兵二部兩畿山東河南浙江湖廣
撫按三司官條具寬恤事宜諸不急務皆罷之甲午
蠲瀧水陽春逋賦五月己巳躬禱雨于南郊六月癸
未河決開封甲辰停應天諸府採辦閏六月壬子詔
自今廷臣議事內閣科道皆會丁卯以京師霖雨遣
使禱于天地神祇秋七月乙亥築沙灣決口成辛巳
給事中徐正請遷上皇於沂王所封國以絕人望別
育宗室子於宮中下獄戍邊甲申禁大臣子弟乞恩
入監庚寅以南京災異屢見勅諸臣修省是月免平
陽及文安災賦八月乙巳勅蕭維禎等考察御史庚

申杖南京大理少卿廖莊于闕下併杖禮部郎中章
綸御史鍾同于獄同遂卒九月乙亥巡撫蘇松副都
御史鄒來學奏賑所部饑民米麥一百萬餘石冬十
月丙午還蘇州諸府漕卒罷民運庚戌大名野蠶成
繭禮臣請表賀不許戊午免西安諸府去年災賦十
一月乙亥湖廣苗亂方瑛佩平蠻將軍印率師討之
癸巳賑任丘河間諸縣饑庚子免揚州淮安諸府及
元城災賦十二月甲寅祈雪己巳免順天蘇州廬州
及和滌武定信陽諸州縣災賦

七年春正月己卯命石璞撫安湖廣軍民乙未免廣

平去年災稅二月庚子朔免應天保定濟南平陽開
封諸府去年災賦庚申皇后崩甲子營壽陵三月免
鳳陽及雲南軍民災賦夏五月戊寅以星變勅責內
外文武諸臣共圖修省辛巳捕畿內蝗壬辰頒寬恤
之令是月免蒲解臨晉黃岡諸州縣去年災賦六月
甲辰免應天太平寧國池州安慶徽州去年災賦庚
申葬肅孝皇后秋七月乙酉伶人李安為錦衣百戶
甲午工匠蒯祥陸祥自太僕少卿進工部侍郎仍董
工作八月丁巳省天下增設官九月甲戌命天下巡
撫巡按御史勘實所部災傷冬十月癸卯巡撫江西

僉都御史韓雍奏賑饑民米三十九萬餘石十二月
己亥方瑛奏破苗賊鬼板等百六十餘寨戊午賑畿
內山東河南水災庚申禁朝覲官往來謁遺癸亥以
有疾罷明年元會是冬免畿內山東及徐山陽被災
稅糧又盡免天下景泰以前逋賦

八年春正月戊辰免瑞州諸府災賦丁丑帝輿疾宿
南郊齋宮己卯胡濙等請建太子不許壬午石亨徐
有貞等迎上皇復于位二月乙未朔廢帝為郕王遷
之西內庚子皇太后吳氏以下皆復故號壬寅掌欽
天監禮部侍郎湯序請革景泰年號不許癸丑帝薨

於西宮年三十初上皇既復位越數日謂文武大臣
曰朕弟病漸愈勝食粥矣事固無豫朕弟小人壞之
耳石亨徐有貞輩聞而愕然遂日夜媒孽至是薨或
曰奄人蔣安縊殺之也謚曰戾毀所營壽陵以親王
禮葬西山給武城中衛軍二百戶守護成化十一年
十二月戊子制曰朕叔郕王踐阼戡難保邦奠安宗
社殆將八載屬彌留之際奸臣貪功妄興讒構請削
帝號先帝旋知其枉每用悔恨以次抵諸姦于法不
幸上賓未及舉正朕敦念親親用成先志可仍皇帝
之號其議謚以聞遂上尊謚曰恭仁康定景皇帝勅

有司修繕陵寢祭饗如諸陵福王立加上尊謚曰符
天建道恭仁康定隆文布武顯德崇孝景皇帝廟號
代宗

論曰帝初以于石之略安定邦家是矣然而東朝之
易南城之錮得無已甚乎迨遘厲虐疾人心皇皇而
儲位不定嗚呼此乾坤何等時也且夫迎立襄邸有
秘謀矣復沂王故物登諸公奏矣金牌符勅之舉與
宣廟冢孫之議盈廷且嘖嘖聚訟矣則夫上皇復辟
寧獨非意中事乎乃帝猶興疾齋宮若罔聞知胡為
者洎於廢處西內一息猶留而讒構交作鮮克有終

豈非當斷不斷之故與噫